

Održan koordinacioni sastanak u okviru GIVE projekta

04.03.2026 11:30



U okviru realizacije Projekta unapređenja geoprostorne infrastrukture i procjene vrijednosti nekretnina (GIVE), u prostorijama Općinskog suda u Sarajevu 4. marta 2026. godine održan je sastanak posvećen nastavku aktivnosti harmonizacije i pripremi narednih koraka za područja općina Ilidža i Ilijaš. Sastanku su prisustvovali predsjednik Općinskog suda u Sarajevu Damir Batotić, načelnik Općine Ilidža Nermin Muzur, načelnik Općine Ilijaš Amar Dovadžija sa saradnicima, te pomoćnici direktora Federalne uprave za geodetske i imovinsko-pravne poslove Denis Tabučić i Sead Hadžić.

Na sastanku je razgovarano o nastavku postupka harmonizacije u navedenim općinama, kao i o narednim operativnim koracima neophodnim za uspješnu realizaciju planiranih aktivnosti. Poseban akcenat stavljen je na značaj pune koordinacije između Općinskog suda u Sarajevu, jedinica lokalne samouprave i Federalne uprave za geodetske i imovinsko-pravne poslove, s ciljem efikasnog i pravovremenog provođenja svih predviđenih zadataka.

Tokom sastanka u potpunosti je usaglašen pristup i model međuinstitucionalne saradnje u realizaciji aktivnosti uspostave zamjene zemljišne knjige. Učesnici su potvrdili zajedničku opredijeljenost da se ovaj proces provodi koordinirano i u skladu s nadležnostima svih uključenih institucija, uz očekivanje da katastarska faza aktivnosti započne u kratkom roku.

Održani sastanak predstavlja važan korak u nastavku realizacije GIVE projekta te potvrđuje spremnost svih relevantnih aktera da kroz partnerski pristup doprinesu unapređenju zemljišne administracije i pravne sigurnosti na području općina Ilidža i Ilijaš.

